



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**25 Janeiru 2024**  
**Parlamentu Nasionál**

**JSMP lamenta ho funksionamentu reuniaun plenária Parlamentu Nasionál no husu ba deputadu sira atu kumpri Rejimentu Parlamentu nian**

JSMP, hahú husi 2010 halo ona observaun regulár ba iha reuniaun plenaria no mós reuniaun Komisaun A Parlamentu Nasionál. Objetivu mak atu kontribui ba promove serbisu no funksionamentu Parlamentu Nasionál nian iha hala'o nia knaar tuir Konstituisaun no Lei sira, liuliu iha halo lei, fiskalizasaun no foti desizaun política hanesan prevee iha Provizaun Artigu 92 Konstituisaun Repúblika Demokrátika Timor-Leste (K-RDTL).

Parlamentu Nasionál, hanesan ho órgaun no instituisaun Estadu sira seluk, iha nia lei própria ne'ebé regula kona-ba nia serbisu no funksionamentu. Lei ne'ebé regula serbisu no funksionamentu Parlamentu nian mak Lei Nú. 15/2009 ne'ebé altera ho Lei Nú. 1/2016 kona-ba Rejimentu Parlamentu Nasionál.

*“Durante JSMP nia observaun ba iha reuniaun plenária Parlamentu Nasionál iha sesaun lejizlativa dahuluk husi Lejizlatura Daneen (VI) nian, nota no lamenta ho reuniaun plenária ne'ebé ladun funsiona ho di'ak tuir Rejimentu Parlamentu nian no fó impaktu ba efetividade serbisu Parlamentu nian. Iha reuniaun plenária sira balun, Deputadu sira ataka malu ho liafuan kroat no to'o atu baku malu tanba kestaun atribuisaun tempu ba uzu palavra ne'ebé konsidera la loos no la justu husi Prezidente Meza Parlamentu Nasionál. Nune'e, JSMP husu atu deputadu sira evita prátika vingansa política hodi kumpri de'it Rejimentu Parlamentu nian atu bele asegura ho di'ak serbisu, funksionamentu reuniaun plenária no dignifika Parlamentu Nasionál nu'udar Uma Fukun nasaun no povu Timor-Leste nian”,* dehan Diretora Ezekutiva JSMP, Sra. Ana Paula Marçal.

Rejimentu Parlamentu hatuur ho klaru no detallu kona-ba direitu no devér deputadu sira-nian iha reuniaun plenária no Komisaun sira nian. Deputadu sira iha direitu ba uzu palavra tuir orden inskrisaun hodi halo intervensaun, partisipa iha debate, apresenta projeu lei ka rezolusaun ka deliberaun ruma, halo defeza ba onra no naran di'ak partidu nian, halo rekursu, husu ka fó esklaresimentu ruma, apresenta reklamasan ka protestu no halo deklarasaun votu hanesan prevee iha provizaun Artigu 57 kona-ba uzu palavra. Alende uzu palavra, iha reuniaun plenária mós deputadu sira iha direitu ba pontu orden hodi invoka Rejimentu ka ajenda serbisu. Deputadu sira bele ezerse sira-nia direitu ba uzu palavra bainhira Prezidente Meza fó no respeito regra edukasaun di'ak hanesan prevee iha provizaun Artigu 63 kona-ba dekoru (respeitu regra morál) no uzu palavra.

Deputadu sira, alende lei ne'e prevee sira nia direitu, prevee mós sira-nia devér sira kona-ba partisipasaun iha reuniaun plenária. Devér sira deputadu sira-nian ne'e prevee iha provizaun Artigu 10, liuliu devér sira prevee iha provizaun parágrafo 2) katak deputadu sira iha reuniaun

plenária tenke respeito dignidade Parlamentu no mós dignidade deputadu sira seluk nian, halo tuir orden no dixerplina ne'ebé prevee iha Rejimentu ne'e no kontribui ba efikasias no prestíjiu serbisu Parlamentu nian liuhusi hahalok ka komportamentu sira.

Nune'e, JSMP hanoin, deputadu sira hanesan representante povu iha Uma Fukun Parlamentu presiza tau interese povu nian aas liu interese partidária hodi hala'o knaar sira tuir Konstituisaun no lei atu bele asegura serbisu no funksionamentu Parlamentu Nasionál nian la'o ho di'ak no eftivu.

*Atividade monitorizasaun ba Parlamentu ne'e realiza ho apoiu finansiera hosi Governu Timor-Leste, liuhosi Fundu Sosiedade Sivil, Diresaun Serbisu Apoiu Sosiedade Sivil no Auditoria Sosiál (SASCAS), Gabinete Primeiru Ministru.*

Atu hetan informasaun liu tán bele kontaktu:

Sra. Ana Paula Marçal  
Diretora Ezekutiva JSMP  
Email: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)